

दिनांक 01.04.2024

समय: 18.45 बजे

आकाशवाणी जयपुर-अजमेर
प्रादेशिक समाचार।

- प्रदेश मांय लोकसभा चुनाव सारू स्टार प्रचारकां रा दौरा चाले—प्रधानमंत्री अर ठावां भाजपा नेता नरेन्द्र मोदी रो काले कोटपूतली दौरा प्रस्तावित।
- मानव अंग प्रत्यारोपण री फर्जी एनओसी काढण रा मामलां मांय एसएमएस अस्पताल रा सहायक प्रशासनिक अहलकार संसपेन्ड।
- प्रदेश मांय शीतलाष्टमी रीत मुजब मनायी ज्यी- न्यारी-न्यारी ठौड़ां मेळा ई भरी ज्या।
- राज्य मांय कुछ ठौड़ां व्ही बिरखा रा पछे गर्मी ऊं थोड़ो आराम-दिन रो तापमान 40 डिग्री सेल्सियस रे नीचे आयो।

प्रदेश मांय लोकसभा चुनाव रा प्रचार रे तैत स्टार प्रचारकां रा दौरां री कड़ी मांय काले प्रधानमंत्री अर ठावा भाजपा नेता नरेन्द्र मोदी रो जयपुर ग्रामीण रा कोटपूतली रो दौरा प्रस्तावित है। प्रधानमंत्री री सभा ने ले र पुलिस अर प्रशासन अलर्ट मोड माथे है। प्रधानमंत्री री हिफाजत मांय तैनात एसपीजी मोर्चो संभाळ लियो है। ठावा भाजपा नेता अर केन्द्रीय गृह मंत्री अमित शाह आज जोधपुर रा रातानाड़ा मांय जोधपुर लोकसभा हलका रा कार्यकर्तावां री बैठक ली। बैठक मांय मुख्यमंत्री भजनलाल शर्मा अर पार्टी रा ओहदादार और कार्यकर्ता मौजूद रिया। श्री शाह कयो के प्रधानमंत्री नरेन्द्र मोदी री अगुवाई मांय देश अभूतपूर्व आर्थिक प्रगति करी है।

एसबी अमित शाह

000

भारतीय जनता पार्टी री चुनाव घोषणा पत्र समिति री बैठक आज नुवी दिल्ली मांय पार्टी मुख्यालय माथे व्ही। समिति आवता लोकसभा चुनाव सारू पार्टी रा घोषणा पत्र माथे बतळ करी। 27 सदस्यां वाळी समिति री पैली बैठक ठावा नेता अर केंद्रीय मंत्री राजनाथ सिंह री सदारत मांय व्ही। ठावा नेता अर केंद्रीय मंत्री निर्मला सीतारमन संयोजक अर पीयूष गोयल पैनेल रा सह-संयोजक है। वठे ई कांग्रेस री केंद्रीय चुनाव समिति तेलंगाना मांय लोकसभा चुनाव मांय उम्मीदवारां रा नाम तैय करण सारू नुवी दिल्ली मांय मीटिंग करी। पार्टी रा अध्यक्ष मल्लिकार्जुन खड़गे, ठावा नेता सोनिया गांधी, तेलंगाना रा मुख्यमंत्री रेवंत रेड्डी अर दूजा नेता ई बैठक मांय मौजूद रिया।

000

राज्य मांय लोकसभा चुनाव रा दूजा दौर सारू नामपाना भरण सारू अबे फगत तीन दिन रो बगत बच्चो है। ई चरण मांय चार अप्रैल ताई नामपाना भर्या जा सके है। पांच अप्रैल

ने पर्चा री जांच करी जाएला अर उम्मीदवार आठ अप्रैल ताई नाम पाछा ले सके है। ई चरण सारू वोट 26 अप्रैल ने पडेला।

000

प्रदेश मांय मतदाता जागरुकता सारू आज ई न्यारा न्यारा कार्यक्रम व्ह्या। सांचौर जिला री भडवल अर भाटीप ग्राम पंचायतां मांय भरी ज्या शीतला सप्तमी मेळा मांय गांव वाळा ने वोट देवण रो महतव बतायी ज्यो। ई दौरान गांव वाळा मतदान सारू संकल्प पानो भर्यो। श्रीगंगानगर मांय लोगां ने वोट देवण सारू प्रेरित करण रा मकसद ऊं मेंहदी, पोस्टर अर रंगोली होडां व्ही। बूंदी मांय मतदाता जागरुकता कार्याक्रमां री कड़ी मांय आज राजकीय कन्या कॉलेज मांय नुवा जुड्या मतदातावां रे साथे जागरुकता संगोष्ठी अर स्वीप प्रश्नोत्तरी होड व्ही। ई दौरान होड रा जीतणियां ने ईनाम दीरीज्या अर सौ फीसदी मतदान री शपथ दिरायी ज्यी। चूरू मांय जागरुकता रैली निकाली ज्यी। भरतपुर मांय चित्रकला होड व्ही, जिण मांय टाबर **मतदान मेरा अधिकार** मुद्दा माथे चित्र बणाया। इण रे अलावा दुकानां अर सार्वजनिक ठोडां माथे मतदान रा संदेश वाळा पोस्टर लगायी ज्यो।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है जयपुर जिला री श्रोता रो संदेश –

000

राज्य सरकार मानव अंग प्रत्यारोपण री फर्जी एनओसी काढण रा मामला मांय तुरत कार्रवाई करता एसएमएस अस्पताल रा सहायक प्रशासनिक अहलकार गौरव सिंह ने सस्पेंड कर दिया है। ई बारा मांय चिकित्सा अर स्वास्थ्य महकमा री अतिरिक्त मुख्य सचिव शुभ्रा सिंह री अगुवाई मांय एक उच्च थर री मीटिंग व्ही। इण मांय अंग प्रत्यारोपण री फर्जी एनओसी देवण रा मामला मांय तुरत कार्यवाही करण अर उच्च थरीय कमेटी ऊं मामला री जांच करवाने 15 दिन मांय रपट पेश करण रा हुकम दीरीज्या। वणा कयो के ई मामला ने ले र सरकार पूरी तरह गंभीर है। मीटिंग मांय एसीबी रा डी.जी राजीव शर्मा बतायो के ब्यूरो ई बारा मांय तुरंत कार्रवाई करता दो लोगां ने गिरफ्तार करया है अर वां रा दफ्तर री तलाशी ले र महताऊ कागजात बरामद करया है। साथै ही वां रा दफ्तर ऊं इलेक्ट्रॉनिक उपकरण ई जब्त करया है। ई बीचे, भ्रष्टाचार निरोधक ब्यूरो रा डी.आई.जी. डॉ. रवि प्रकाश बतायो के ब्यूरो कानी ऊं मामला मांय जयपुर रा दूजा अस्पतालां मांय ई तपतीश करी जावे।

000

प्रदेश मांय आज मलेरिया क्लेश कार्यक्रम सारू व्ह्यो। ई कार्यक्रम रे दौरान आवती 14 मई ताई घर-घर सर्वे करने माछरां री रोकथाम सारू असरदार कार्यवाही करी जाएला। ई दौरान लोगां ने साफ-सफाई अर माछरां ऊं पैदा होवण वाळी बीमारियां ऊं बचाव सारू जाग जगायी जायला। क्लेश कार्यक्रम सारू चिकित्सा महकमो न्यारी-न्यारी टीमां बणायी है।

000

जैसलमेर रा पोकरण फील्ड फायरिंग रेंज मांय आज ऊं भारतीय वायु सेना रो युद्धाभ्यास गगन शक्ति व्हे रियो है। दस दिन ताई चालण वाळा ई युद्धाभ्यास मांय देश रा सगळा वायु सेना टेशन भाग ले रिया है। इण मांय तेजस, राफेल, सुखोई-30, जगुआर, ग्लोबमास्टर, चिनुक, अपाचे अर प्रचंड समेत केई लड़ाकू विमानां रो दरसाव व्हेला।

000

प्रदेश मांय आज लोकपर्व बास्योडा रीत मुजब मनायो जावे। ई मौके महिलावां सज संवर ने मिन्दरां मांय ठण्डा पकवानां ऊं शीतला माता रे भोग लगायो। टोंक जिला रा ऐतिहासिक शीतला माता मिन्दर मांय माता शीतला री खास झांकी सजाई ज्यी। केकड़ी मांय शीतला माता रा मिन्दर ने मोवणी रोशनी ऊं सजायी ज्या है। शीतलाष्टमी माथे आज राज्य रा न्यारी-न्यारी ठोडां मेळा ई लगायी ज्या। बालोतरा जिला रा कनाना मांय ई मेळो भरी ज्यो। जालौर मांय शीतला माता रो मेळो भरीजै। सवाईमाधोपुर मांय रीत मुजब सिरधाभाव रे सागे शीतला सप्तमी मनायी ज्यी। जयपुर जिला रा चाकसू मांय शील की डूंगरी मांय नामी शीतला माता रो मेळो भरीजै। और ब्यौरो म्हारा खबरनवीस ऊं-

उठी ने सलूम्वर जिला रा परसाद हलका मांय शीतला सप्तमी माथे आदिवासी नेजा लूटण री रीत निभावे है।

000

राजस्थान रा राजभवन मांय आज ओडिशा थापना दिवस मनायी ज्यो। राज्यपाल कलराज मिश्र ई दौरान ओडिशा रा लोगां ऊं बतळ करने वां ने थापना दिवस री शुभकामनावां दी। श्री मिश्र कयो के ओडिशा ठावी पारंपरिक विरासत रे साथे जीवत संस्कृति वाळो प्रदेश है। राज्यपाल ओडिशा रा ठावा अतीत ने याद करता आवण वाळा बगत मांय विकास सारू बरोबर प्रतिबद्ध व्हे र काम करण माथे जोर दियो।

000

जोधपुर रा सालावास मांय आज डंपर री फेंट मांय आ जावण ऊं मोटरसाइकिल माथे जा रिया तीन लोगां री मौत व्हे ग्यी। डंपर ने ओवरटेक करती बगत मोटरसाइकिल स्लिप व्हे र डंपर रे नीचे आय ग्यी, जिण ऊं तीन्यू री मौका माथे मौत व्हे ग्यी। हनुमानगढ़ मांय एक बण रिया मकान री छत पड जावण ऊं मळबा मांय दबने एक महिला री मौत व्हे ग्यी। हादसा मांय तीन लोग घायल व्हे ग्या। नगर परिषद री सभापति सुमित रिणवा पीडित परिवार ने 50 हजार रूपया री माली मदद मुहैया करायी है।

000

राज्य मांय कुछ ठोडां माथे अजे ई व्ही बिरखा रे पछै गर्मी ऊं थोडो आराम मिल्यो है। प्रदेश मांय बत्ती रो तापमान 40 डिग्री सेल्सियस ऊं नीचे आ ग्यो है। घणखर ठोडां दिन रो तापमान सामान्य ऊं नीचे चाल रियो है। लारला चौबीस घंटा मांय सब ऊं बत्ती 39 डिग्री सेल्सियस तापमान फलौदी मांय दर्ज करी ज्यो। राजधानी जैपर मांय बत्ती रो तापमान 36 दशमलव 2 डिग्री सेल्सियस दर्ज व्हीयो। मौसम महकमा मुजब आवण वाळा एक-दो दिन मांय तापमान मांय कोई खास बदलाव नी होवण री आस है। इण रे अलावा दिन रा तापमान मांय 2 ऊं 4 डिग्री सेल्सियस री बढवार व्हे सके है। ई बीचे, चिकित्सा अर स्वास्थ्य महकमो करडी गर्मी अर लू ऊं बचाव रा बारा मांय एडवाइजरी काढी है।

000

तेल विपणन कंपनियों देशभर मांय 19 किलो वजन वाळा वाणिज्यिक एलपीजी सिलेण्डर रा दाम कम कर दिया है। इण मांय न्यारा न्यारा शहरां मांय 30 ऊं 32 रूपया ताई री कमी करीजी है। दिल्ली मांय वाणिज्यिक सिलेण्डर री कीमत एक हजार 795 ऊं घटने अवे एक हजार 764 रूपया व्हे गयी है।

000